

水經注匯校卷十七

後魏 酈道元 撰

渭水

渭水出隴西首陽縣渭谷亭南鳥鼠山

渭水出首陽縣首陽山渭首亭南谷山在鳥鼠山西北此縣有高城嶺嶺上有城號渭源城渭水出焉三源合注東北流逕首陽縣西與別源合水南出鳥鼠山渭水谷尚書禹貢所謂渭出鳥鼠者也地說曰鳥鼠山同穴之枝幹也渭水出其中東北過同穴枝間既言其過明非一山也又東北流而會于殊源也渭水東南流逕首陽縣南右得封溪水次南得廣相溪水次東得共谷水左則天馬溪水次

水經注匯校 卷十七

南則伯陽谷水並參差翼注亂流東南出矣

東北過襄武縣北

案東北原本及近刻並作又北考注云渭水常若東南不東北也可證又乃東之訛

廣陽水出西山二源合注共成一川東北流注于渭渭水

又東南逕襄武縣東北荆頭川水入焉水出襄武西南鳥

鼠山荆谷東北逕襄武縣故城北王莽更名相桓漢護羌

校尉温序行部為隗囂部將苟宇所拘銜鬚自刎處也其

水東北流注于渭渭水常若東南不東北也又東泉水注

之水出西南雀富谷東北逕襄武縣南東北流入于渭魏

志稱咸熙二年襄武上言犬人見身長三丈餘跡長三尺

二寸白髮著黃單衣巾拄杖呼民王始語云今當太平十

二月天祿永終歷數在晉遂遷魏而事晉

又東過獮道縣南

右則岑溪水次則同水俱左注之次則過水右注之渭水又東南逕獮道縣故城西昔秦孝公西斬戎之獮王應劭曰獮戎邑也漢靈帝中平五年別爲南安郡赤亭水出郡之東山赤谷西流逕城北南入渭水渭水又逕城南得粟水水出西南安都谷東北流注于渭渭水又東新興川水出西南烏鼠山二源合舍東北流與彰川合水出西南溪下東北至彰縣南本屬故道侯尉治後漢縣之永元元年和帝封耿秉爲侯國也萬年川水出南山東北流注之又東北注新興川又東北逕新興縣北晉書地道記南安之屬縣也其水又東北與南川水合水出西南山下東北合

北水又東北注于渭水渭水又東逕武城縣西武城川水入焉津源所導出鹿部西山兩源合注東北流逕鹿部南亦謂之鹿部水又東北昌丘水出西南丘下東北注武城水亂流東北注渭水渭水又東入武陽川又有關城川水出南安城谷水出北兩川參差注渭水渭水又東有落門西山東流三谷水注之三川統一東北流注于渭水有落門聚昔馮異攻落門未拔而薨建武十年來歙又攻之擒隗囂子純隴右平渭水自落門東至黑水峽左右六水夾注左則武陽溪水次東得土門谷水俱出北山南流入渭左則溫谷水次東有故城溪水次東有閭里溪水亦名習溪水次東有黑水並出南山北流入渭渭水又東出黑水

峽歷冀川

又東過冀縣北

渭水自黑水峽至岑峽南北十一水注之北則温谷水導平襄縣南山温溪東北流逕平襄縣故城南故襄戎邑也王莽之所謂平相矣其水東南流歷三堆南又東流南屈歷黃槐川梗津渠冬則輟流春夏水盛則通川注渭次則牛谷水南入渭水南有長塹谷水次東有安蒲溪水次東有衣谷水並南出朱圉山山在梧中聚有石鼓不擊自鳴鳴則兵起漢成帝鴻嘉三年天水冀南山有大石自鳴聲隱隱如雷有頃止聞于平襄二百四十里野雞皆鳴石長丈三尺廣厚略等著崖脅去地百餘丈民俗名曰石鼓石

水經注匯校

卷十七

三

鼓鳴則有兵是歲廣漢鉗子攻死囚盜庫兵略吏民衣繡

衣自號為仙君黨與漫廣

朱箋漢書五行志廣漢鉗子自號山君黨與漫廣

明年

冬伏誅自歸者三千餘人信而有徵矣其水北逕冀縣城北秦武公十年伐冀戎縣之故天水郡治王莽更名鎮戎縣曰冀治漢明帝永平十七年改曰漢陽郡城即隗囂稱西伯所居也後漢馬超之圍冀也涼州別駕閻伯儉潛出水中將告急夏侯淵為超所擒令告城無救伯儉曰大軍方至咸稱萬歲超怒數之伯儉曰卿欲令長者出不義之言乎遂殺之渭水又東合冀水水出冀谷次東有濁谷水次東有當皇溪水次東有託里水次東有渠谷水次東有黃土川水俱出南山北逕冀城東而北流注于渭渭水又

東出岑峽入新陽川逕新陽下城南溪谷赤蒿一水並出  
南山東北入渭水渭水又東與新陽崖水合卽隴水也東  
北出隴山其水西流右逕瓦亭南隗囂聞略陽陷使牛邯  
守瓦亭卽此亭也一水亦出隴山東南流歷瓦亭北又西  
南合爲一水謂之瓦亭川西南流逕清賓溪北又西南與  
黑水合水出黑城北西南逕黑城西西南流莫吾南川水  
注之水東北出隴垂西南流歷黑城南注黑水黑水西南  
出懸鏡峽又西南入瓦亭水又有澁水自西來會世謂之  
鹿角口又南逕阿陽縣故城東中平元年北地羌胡與邊  
章侵隴右漢陽長史蓋勳屯阿陽以拒賊卽此城也其水  
又南與燕無水合水源延發東山西注瓦亭水瓦亭水又

水經注匯校

卷十七

四

南左會方城川西注瓦亭水瓦亭水又南逕成紀縣東歷  
長離川謂之長離水右與成紀水合水導源西北當亭川  
東流出破石峽津流遂斷故瀆東逕成紀縣故帝太皞庖  
犧所生之處也漢以爲天水郡縣王莽之阿陽郡治也又  
東潛源隱發通入成紀水東南入瓦亭水瓦亭水又東南  
與受渠水相會水東出大隴山西逕受渠亭北又西南入  
瓦亭水瓦亭水又西南流歷僵人峽路側巖上有死人僵  
尸巒穴故岫壑取名焉釋峯就穴直上可百餘仞石路透  
池劣通單步僵尸倚窟枯骨尚全惟無膚髮而已訪其川  
居之士云其鄉中父老作童兒時已聞其長舊傳此當是  
數百年骸矣其水又西南與略陽川水合水出隴山香谷

西西流右則單溪西注左則閤川水入焉其水又西歷蒲池郊石魯水出東南石魯溪西北注之其水又西歷略陽川西得破社谷水次西得平相谷水又西得金里谷水又西得南室水又西得蹠谷水並出南山北流于略陽城東揚波北注川水又西逕略陽道故城北塋渠水出南山北逕塋峽北入城建武八年中郎將來歙與祭遵所部護軍王忠右輔將軍朱寵將二千人皆持鹵刀斧自安民縣之楊城元始二年平帝罷安定滹沱苑以爲安民縣起官寺市里案元始二年至此從番須回中伐樹木開山道至略陽夜襲擊囂拒守將金梁等皆殺之因保其城隗囂聞略陽陷悉眾以攻歙激水灌城光武親將救之囂走西城世

祖與來歙會于此其水自城北注川一水二川蓋囂所竭以灌略陽也川水西得白楊泉又西得蒲谷水又西得蒲谷西川又西得龍尾溪水與蒲谷水合俱出南山飛清北入川水川水又西南得水洛口水源東導隴山西逕水洛亭西南流又得犢奴水口水出隴山西逕犢奴川又西逕水洛亭南西北注之亂流西南逕石門峽謂之石門水西南注略陽川略陽川水又西北流入瓦亭水瓦亭水又西南出顯親峽石宕水注之水出北山山上有女媧祠庖犧之後有帝女媧焉與神農爲三皇矣其水南流注瓦亭水瓦亭水又西南逕顯親縣故城東南漢封大鴻臚竇固爲侯國自石宕次得蝦蟆溪水次得金黑水又得宜都溪水

咸出左右參差相入瓦亭水又東南合安夷川口水源東出胡谷西北流歷夷水川與東陽川水會謂之取陽交又西得何宕川水又西得羅漢水並自東北西南注夷水夷水又西逕顯親縣南西注瓦亭水瓦亭水又東南得大華谷水又東南得折里溪水又東得六谷水皆出近溪湍峽注瓦亭水又東南出新陽峽崖岫壁立水出其間謂之新陽崖水又東南注于渭也

又東過上邽縣

渭水東歷縣北邽山之陰逕固嶺東北東南流蘭渠川水出自北山帶佩眾溪南流注于渭渭水東南與神澗水合開山圖所謂靈泉池也俗名之爲萬石灣淵深不測實

水經注匯校

卷十七

六

爲靈異先後漫遊者多罹其斃渭水又東南得歷泉水水北出歷泉溪東南流注于渭渭水又東南出橋亭西又南得藉水口水出西山百澗聲流總成一川東歷當亭川卽當亭縣治也左則當亭水右則曾席水注之又東與大弁川水合水出西山二源合注東歷大弁川東南流注于藉水藉水又東南流與竹嶺水合水出南山竹嶺二源同瀉東北入藉水藉水又東北逕上邽縣左佩四水東會占溪水次東有大魯谷水次東得小魯谷水次東有楊反谷水咸自北山流注藉水藉水右帶四水竹嶺東得亂石溪水次東得木門谷水次東得羅城溪水次東得山谷水皆導源南山北流入藉水藉水又東黃瓜水注之其水發源黃

瓜西谷東流逕黃瓜縣北又東清溪白水左右夾注又東北大旱谷水南出旱溪歷澗北流泉溪委漾同注黃瓜水黃瓜水又東北歷赤谷咸歸于藉藉水又東得毛泉谷水又東逕上邽城南得覈泉水並出南山北流注于藉藉水卽洋水也北有濛水注焉水出縣西北邽山翼帶眾流積以成溪東流南屈逕上邽縣故城西側城南出上邽故邽戎國也秦武公十年伐邽縣之舊天水郡治五城相接北城中有湖水有白龍出是湖風雨隨之故漢武帝元鼎三年改爲天水郡其鄉居悉以板蓋屋詩所謂西戎板屋也濛水又南注藉水山海經曰邽山濛水出焉而南流注于洋謂是水也藉水又東得陽谷水又得宕谷水並自南山

北入于藉藉水又東合段溪水水出西南馬門溪東北流合藉水藉水又東入于渭渭水又歷橋亭南而逕綿諸縣東與東亭水合亦謂之爲橋水也清水又或爲通稱矣水源東發小隴山眾川瀉注統成一水西入東亭川爲東亭水與小祇大祇二水合又西北得南神谷水三川並出東南差池瀉注又有埋蒲水翼帶二川與延水並西南注東亭水東亭水又西右則歎溝水次西得麴谷水水出東南二溪西北流注東亭川東亭川水右則溫谷水出小隴山又西莎谷水出南山莎溪西南注東亭川水東亭川水又西得清水口水導源東北隴山二源俱發西南出隴口合成一水西南流歷細野峽逕清池谷又逕清水縣故城東

王莽之識睦縣矣其水西南合東亭川自下亦通謂之清水矣又涇清水城南又西與秦水合水出東北大隴山秦谷二源雙導歷三泉合成一水而歷秦川川有故秦亭秦仲所封也秦之爲號始自是矣秦水西逕降隴縣故城南又西南自亥松多二水出隴山合而西南流逕降隴城北又西南注秦水秦水又西南歷隴川逕六槃口過清水城西南注清水清水上下咸謂之秦川又西羌水注焉水北出羌谷引納眾流合以成溪澁水星會謂之小羌水西南流左則長谷水西南注之右則東部水東南入焉羌水又南入清水清水又西南得綿諸水口其水導源西北綿諸溪東南有長思水北出長思溪南入綿諸水又東南歷綿

諸道故城北東南入清水清水東南注渭渭水又東南合涇谷水水出西南涇谷之山東北流與橫水合水出東南橫谷西北逕橫水壙又西北入涇谷水亂流西北出涇谷峽又西北軒轅谷水注之水出南山軒轅溪南安姚瞻以爲黃帝生于天水在上邽城東七十里軒轅谷皇甫謐云生壽丘丘在魯東門北未知孰是也其水北流注涇谷水涇谷水又西北白城溪東北流白娥泉水出其西東注白城水白城水又東北入涇谷水涇谷水又東北歷董亭下楊難當使兄子保宗鎮董亭卽是亭也其水東北流注于渭山海經曰涇谷之山涇水出焉東南流注于渭是也渭水又東伯陽谷水入焉水出刑馬之山伯陽谷北流白水



出東南白水溪西北注伯陽水伯陽水又西北歷谷引控羣流北注渭水渭水又東歷大利又東南流苗谷水注之水南出刑馬山北歷平作西北逕苗谷屈而東逕伯陽城南謂之伯陽川蓋李耳西入往逕所由故山原畎谷往往播其名焉渭水東南流眾川瀉浪雁次鳴注左則伯陽東溪水注之次東得望松水次東得毛六溪水次東得皮周谷水次東得黃杜東溪水出北山南入渭水其右則明谷水次東得丘谷水次東得丘谷東溪水次東有鉗巖谷水並出南山東北注渭渭水又東南出石門度小隴山逕南由縣南東與楚水合世所謂長蛇水水出汧縣之數歷山也南流逕長蛇成東魏和平三年沈氏大成云和平乃北魏文成帝年號築

水經注匯校 卷十七

九

徙諸流民以遏隴寇楚水又南流注于渭關駟以是水為汧水焉渭水又東汧汧二水入焉余按諸地志汧水出汧縣西北關駟十三州志與此同復以汧水為龍魚水蓋以其津流逕通而更攝其通稱矣渭水東入散關抱朴子神仙傳曰老子西出關關令尹喜候氣知真人將有西遊者遇老子彊令之著書耳不得已為著道德二經謂之老子書也有老子廟于寶搜神記云老子將西入關關令尹喜好道之士覩真人當西乃要之途也皇甫士安高士傳云老子為周柱下史及周衰乃以官隱為周守藏室史積八十餘年好無名接何云好無名接難曉然又似非直如箋所引高士傳謂老子好養精氣接而不施之而世莫知其真人也至周景王十年孔子年十七遂

適周見老聃然幽王失道平王東遷關以捍移人以職徙尹喜候氣非此明矣往逕所由茲焉或可渭水又東逕西武功北俗以爲散關城非也褚先生乃曰武功扶風西界小邑也蜀口棧道近山無他豪易高者是也渭水又與扞水合水出周道谷北逕武都故道縣之故城西王莽更名曰善治也故道縣有怒特祠列異傳曰武都故道縣有怒特祠云神本南山大梓也昔秦文公二十七年伐之樹瘡隨合秦文公乃遣四十人持斧斫之猶不斷疲士一人傷足不能去臥樹下聞鬼相與言曰勞攻戰乎其一曰足爲勞矣又曰秦公必持不休答曰其如我何又曰赤灰跋于子何如乃默無言臥者以告令士皆赤衣隨所斫以灰跋

水經注匯校 卷十七

十

樹斷化爲牛入水故秦爲立祠其水又東北歷大散關而入渭水也渭水又東南右合南山五溪水夾澗流注之

又東過陳倉縣西

縣有陳倉山山上有陳寶雞鳴祠昔秦文公感伯陽之言遊獵于陳倉遇之于此坂得若石焉其色如肝歸而寶祠之故曰陳寶其來也自東南暉暉聲若雷野雞皆鳴故曰雞鳴神也地理志曰有上公明星黃帝孫舜妻盲冢祠有羽陽宮秦武王起應劭曰縣氏陳山姚睦曰黃帝都陳言在此榮氏開山圖註曰伏犧生成紀徙治陳倉非陳國所建也魏明帝遣將軍太原郝昭築陳倉城成諸葛亮圍之亮使昭鄉人靳祥說之不下亮以數萬攻昭千餘人以雲

梯衝車地道逼射昭昭以火射連石拒之亮不利而還今  
汧水對亮城是與昭相禦處也陳倉水出于陳倉山下東  
南流注于渭水渭水又東與綏陽溪水合其水上承斜水  
水自斜谷分注綏陽溪北屆陳倉入渭故諸葛亮與兄瑾  
書曰有綏陽小谷雖山崖絕險溪水縱橫難用行軍昔邏  
候往來要道通入今使前軍斫治此道以向陳倉足拔連  
賊勢使不得分兵東行者也渭水又東逕郁夷縣故城南  
地理志曰有汧水祠王莽更之曰郁平也東觀漢記曰隗  
囂圍來歙于略陽世祖詔曰桃花水出船檣皆至郁夷陳  
倉分部而進者也汧水入焉水出汧縣之蒲谷鄉弦中谷  
決爲弦蒲藪爾雅曰水決之澤爲汧汧之爲名寔兼斯舉

水經注匯校

卷十七

十一

水有二源一水出縣西山世謂之小隴山巖嶂高險不通  
軌轍故張衡四愁詩曰我所思兮在漢陽欲往從之隴坂  
長其水東北流歷澗注以成淵潭漲不測出五色魚俗以  
爲靈而莫敢採捕因謂是水爲龍魚水自下亦通謂之龍  
魚川川水東逕汧縣故城北史記秦文公東獵汧田因遂  
都其地是也又東歷澤亂流爲一右得白龍泉泉徑五尺  
源穴奮通淪漪四泄東北流注于汧汧水又東會一水水  
發南山西側俗以此山爲吳山三峰霞舉疊秀雲天崩巒  
傾返山頂相捍望之恒有落勢地理志曰吳山在縣西古  
文以爲汧山也國語所謂虞矣山下石穴廣四尺高七尺  
水溢石空懸波側注滿漭震盪發源成川北流注于汧自

水會上下咸謂之爲龍魚川。汧水又東南逕隃麋縣故城南。王莽之扶亭也。昔郭欽、耿況爲侯國矣。汧水東南歷慈山。東南逕郿。四年光武封耿況爲侯國矣。汧水東南歷慈山。東南逕郿。夷縣平陽故城南。史記秦甯公二年徙平陽。徐廣曰：故郿之平陽亭也。成北有漢郿州刺史趙融碑。靈帝建安元年立。汧水又東流注于渭。渭水之右，礪溪水注之。水出南山。茲谷乘高激流，注于溪中。溪中有泉，謂之茲泉。泉水潭積自成淵。渚卽呂氏春秋所謂太公釣茲泉也。今人謂之九谷石壁，深高幽隍，窳密林障，秀阻人跡罕交。東南隅有一石室，蓋太公所居也。水次平石，釣處卽太公垂釣之所也。其投竿蹠餌兩鄰遺跡猶存。是有礪溪之稱也。其水清冷。

神異北流十二里，注于渭北。去維堆城七十里。渭水又東逕積石原，卽北原也。青龍二年，諸葛亮出斜谷，司馬懿屯渭南。雍州刺史郭淮策亮必爭北原，而屯遂先據之。亮至果不得上渭水，又東逕五丈原。北魏氏春秋曰：諸葛亮據渭水南原，司馬懿謂諸將曰：亮若出武功，依山東轉，者是其勇也。若西上五丈原，諸君無事矣。亮果屯此原，與懿相禦。渭水又東逕郿縣故城南。地理志曰：右輔都尉治。魏春秋，諸葛亮寇郿，司馬懿據郿拒亮，卽此縣也。渭水又東逕郿塢。南漢獻帝傳曰：董卓發卒築郿塢，高與長安城等。積穀爲三十年儲。自云事成，雄據天下，不成守此，足以畢老其愚如此。

案渭水又東逕郿塢，南至此原本及近刻並訛。在後雍水之末，又南流注于渭下。今考元和志

云郿縣故城在今縣東北十五里董卓塢在縣東北十六里寰宇記云武功故城在今郿縣東四十里郿塢卽與郿縣故城北近不得隔越武功方及郿塢今改正

水經注匯校卷十七終

水經注匯校

卷十七